

欽定字惠全書

孚惠全書卷十六

偏隅蠲緩

五

乾隆十二年二月初九日奉

上諭豫省地丁錢糧今歲係輪免之年其耗羨舊欠等項俱予停緩俟次年補徵惟該省有額徵隨漕銀兩支給運軍行月錢糧例不蠲免但此項銀兩通省按畝徵收皆時零小數小民難以輸將且豫省去歲亦有被災之處朕所軫念著照耗羨等銀之例將該省隨漕銀一十一萬八千餘兩緩至戊辰年補徵再歸德府屬有徵解江南船料銀兩亦係按畝徵收事同一例亦著緩至來年徵納其本項應用銀兩該撫酌量借撥該部即遵諭行

七月初一日奉

上諭據山東巡撫阿里衮奏稱濟南府屬之歷城
章邱泰安府屬之萊蕪沂州府屬之蘭山郯城東
昌府屬之臨清州衛並濟寧州低窪沿河村舍有
被水之處其東昌府屬之聊城堂邑莘縣夏津臨
清館陶東昌衛青州府屬之益都兗州府屬之陽
穀滕縣等處被雹現已委員會同地方官確勘果
否成災取具分數冊結詳報倒塌廬舍給資修葺
淹斃人口資助掩埋捐傷秋禾酌給籽種及時補
種等語東昌被水被雹州縣並前報被水之魚臺
長清共二十州縣衛即使不致成災窮黎殊可憫
惻著該撫加意撫恤務令得所其災戶應徵新舊

錢糧俱著緩徵俟查明後照例辦理以紓民困

十五日奉

上諭前據山東巡撫阿里衮奏稱歷城等二十縣
衛被水被雹朕已諭令緩徵今據續報濟南府屬
之德州陵縣德州衛泰安府屬之泰安肥城東平
州東阿平陰武定府屬之青城利津霑化兗州府
屬之滋陽曲阜寧陽鄒縣金鄉濟寧衛嘉祥汶上
壽張並東平守禦所曹州府屬之荷澤鉅野鄆城
單縣城武沂州府屬之費縣東昌府屬之博平清
平高唐恩縣青州府屬之博興高苑樂安等三十
四州縣衛所六月下旬大雨時行山水漲發沿山
傍水窪下鄉村一時宣洩不及晚穀未免損傷等

語雖屬偏災而被水窮黎深可憫惻著該撫加意撫恤所有應徵新舊錢糧概緩徵收以紓民力查明後應行辦理之處照例作速辦理務令得所

二十一日奉

上諭今歲浙江被水各縣朕已降旨分別撫卹其淳安壽昌遂安等處受災較重該省本年錢糧俱已蠲免而漕項尚應徵收若照例令其完納民情未免拮据著加恩將被水傷重地方應徵本年漕項俱行緩徵以紓民力至此等災民交冬之際如有衣食更覺艱難之處并令該撫查明辦理量加賑卹以資接濟

九月初六日奉

上諭本年七月十四日蘇松等處猝被風潮而崇明一邑被災為尤重朕前據安寧奏報深為憫惻即降旨諭令加意撫卹並截留漕米以備接濟又令大學士高斌留南查辦月餘以來憂心未嘗稍釋今續據安寧查報崇明一邑坍塌房屋漂沒人民甚多似此非常之災朕覽奏徬徨軫惻寢食為之不寧唯有速籌補救庶災黎得獲安全現據安寧奏報已撥運倉穀二十萬餘石並弛海口之禁俾商販流通米價不致甚貴則米糧一項似可無虞唯是房屋坍塌災民無棲身之所况轉瞬即屆嚴冬應速行給資修葺並於常例之外量為加增俾得從容措辦至於來春播種關係綦重亟應借

給籽種及時耕作亦令該督撫董率有司豫行經理又思崇邑被災既重縱使賑卹多方恐元氣不能驟復所有該縣應徵明年地丁錢糧特沛殊恩全行豁免至本年未完地丁以及折徵漕項并歷年帶徵緩徵銀兩概予停緩其綠旗兵丁朕已加恩一體查卹但念伊等廬舍人口同被災傷雖經安輯未免拮据著再加恩各賞給一月錢糧以資用度至寶山鎮洋各處被災次於崇明輕重不等其應如何賑恤加恩之處著大學士高斌會同該督撫悉心酌議無拘常例妥協辦理務使凋瘵復蘇登災黎於衽席以副朕夙夜焦勞惻愴靡寧之意該部即遵諭速行

御製江南潮災歎

有序
丁卯

乾隆丁卯七月望蘇松雁海潮之患崇明南匯
為最重連延數州縣漂室廬溺老幼不可勝計
督撫奏報賑救之策亦既殫力竭心而下詔蠲
稅截漕更復多方籌畫然遙顧羣黎憾憾不能
去諸懷夫六幕不調洪波示警伊誰之咎歟爰
效杜甫同谷作歌之體為江南潮災歎用示督
撫諸臣兼以自訟云爾

江南古來稱澤國十歲九滂患不息集議為謀疏
浚方補救惟應盡人力潮災數十歲一遇不先不
後於茲值嗚呼一歌兮歌始辭遙遙南望興嗟咨
有奏有奏自南來七月望日潮為災天網濔濔洪

濤湧氣壓百川為倒迴縱有禹也應束手胥為魚
矣惟增哀嗚呼二歌兮歌再陳披奏到今常感平
蘇松郡邑濱大海叶民乏那堪遇凋瘵一夕風濤
多沒淪南匯崇明首稱最去歲淮揚河患重胡乃
災傷一時會嗚呼三歌兮歌放言波臣何處為招
魂

彼時聞道多東風赤龍奮怒長蛟洪鼉鼉蠓蝸借
勢雄磨牙礪爪思腹充萬間茅屋如捲蓬須臾化
作馮夷宮嗚呼四歌兮歌四疊傷哉吾民命輕葉
民命輕如葉可傷昏夜走避無向方巨浪連山風
更鼓溶溶汨汨雨屑涼屋廬漂蕩全家沒其稍幸
者乃有孤兒孀婦哭其傍嗚呼五歌兮歌未闌不

必眼見涕洟瀾

死者已矣生堪憫驚魂纔定沉酸引強奪弱餐祇
為飢母牽子售非由恩此時破屋已無依轉眼冬
來更寒窘嗚呼六歌兮歌將已不為空言徒罪已
誰云救災無善策盡一分心一分益截漕蠲稅粗
示槩調劑詳籌牧臣職倉儲庫帑莫吝慳墨吏豪
胥戒侵索嗚呼七歌兮歌悄終吾言有盡心何窮

二十五日奉

上諭江南鳳潁泗三屬頻年被災所有借給籽種
口糧銀米曾經降旨將乾隆六七兩年借項於丙
寅戌辰二年分還乾隆十年借項於己巳庚午二
年分還但上年該處復被偏災今歲又值蠲免停

緩之年若於戊辰年全行催輸民力未免拮据著
加恩將從前分年帶徵之項分作戊辰己巳庚午
三年按限徵還八九兩年借項亦於此三年內帶
納其十一年出借之項著緩至辛未年催徵該督
撫等務須轉飭屬員妥協辦理以副朕體恤災黎
之意該部遵諭速行

十月十九日奉

上諭安徽宿虹等處秋禾被水成災業經加恩賑
恤其漕項銀米例應照常徵納但思該地方積歉
之餘民間元氣未復輸將未免拮据所有宿州靈
璧虹縣并宿州一衛應徵漕項銀米俱著暫緩徵
收俟來秋補徵搭運其未完節年漕項亦著停緩

照例分年帶徵以紓民力該部即遵諭行

二十二日奉

上諭甘肅之皋蘭金縣靖遠安定會寧五縣本年
均被旱災且連歲歉收舊欠不少若一并徵輸民
力未免拮据著將歷年未完額徵銀糧自乾隆戊
辰年起分作五年帶徵其狄道隴西安化真寧寧
州靜寧禮縣七州縣收成亦各有歉薄其歷年欠
項一時完納維艱著將此七州縣歷年未完額徵
銀糧自乾隆戊辰年起分作四年帶徵以紓民力

十二月二十二日奉

上諭山東省明歲係輪免錢糧之年所有乾隆十
二年未完地丁銀兩應於奏銷前按欠催徵朕思

本年齊河等各州縣被災地畝應完錢糧已照例蠲緩其勘不成災及不被災之處與災地毗連者收穫未能豐裕歲內完納錢糧已屬竭蹶若明歲奏銷以前再令完納未免拮据著將應徵未完錢糧於奉到諭旨之日加恩停緩展至己巳年照例帶徵以紓民力

乾隆十三年二月十七日奉

上諭上年甘肅蘭州等府屬有被旱成災之處已加恩賑恤俾災黎不致失所惟是本年地丁銀兩例於二月開徵朕念入春以來現在加賑去麥秋尚遠其應納額銀即於此時徵輸小民未免拮据著將蘭州等府屬之皋蘭金縣狄道靖遠安定會

寧隴西通渭西固廳鹽茶廳平番中衛靈州十三處被災地方所有本年應納錢糧緩至秋成後再行徵收以紓民力該部遵諭速行

三月初八日奉

上諭上年直屬天津靜海文安大城霸州永清武清河間任邱南皮青縣滄州慶雲寶坻津軍等十五州縣廳被水成災業已加展賑期多方撫卹目下間徵已屆恐貧民尚不免拮据所有各該州縣廳應輸本年錢糧除未被水村莊仍令照例輸納其被災及現在加賑之處俱著加恩緩至麥熟後開徵以紓民力該部即遵諭行

二十一日奉

上諭直隸天津河間二府屬有疊被偏災之處已
屢次加恩頻年蠲賑俾小民不致失所但年來因
災停緩之地糧并民借等項未完甚多有數倍於
額賦者若一時並徵民力未免拮据著將天津河
間二府屬所有乾隆十年以前停緩帶徵地糧銀
兩及乾隆十二年以前民借各項令該督查明再
展年限分晰帶徵至慶雲一縣土瘠民貧屢被災
歉朕已恩加格外減去額賦借給牛種期以漸蘇
民困其歷年積欠更多應較他處再加寬展俾催
科不擾元氣盡復以裕閭閻生計著該督一并確
查分別年限奏明辦理該部即遵諭行

四月初五日奉

上諭據山東巡撫阿里衮奏稱東省被水州縣成災地畝應徵漕糧業經題請分別緩帶其未被災地畝糧石例應催徵完納惟兗州府屬之滋陽滕縣寧陽縣三處因不成災地畝俱與災地毗連收成歉薄一時完納不前應請緩至本年秋季後徵輸等語滋陽等三縣被水歉收民食艱難朕巡行時所親見而深悉者著加恩將此三縣無論成災不成災地畝乾隆十二年應徵未完漕糧全行寬免以蘇民困該部即遵諭速行

二十三日奉

上諭江南崇明一邑上年猝被潮災已降旨將乾隆十三年地丁錢糧全行豁免其隨徵耗羨及應

徵之蘆課皇莊籽粒銀兩不在蠲免之例但念該處大祲之後實非尋常拮据可比著加恩一并豁免俾民力得以稍紓該部即遵諭行

五月二十二日奉

上諭河南歸德府屬之永城鹿邑夏邑三縣九年之中六被水災雖屢經蠲賑而錢糧積欠甚多難以按期完納是以十二年十月內曾經降旨將永城鹿邑夏邑三縣乾隆十年分未完帶徵銀兩緩至戊辰年徵收其乾隆十一年未完帶徵銀兩緩至己巳年開徵今屆戊辰之年理應徵乾隆十年帶徵銀兩但該三縣尚有乾隆十年水災案內未完帶徵緩徵及司庫歸補銀兩乾隆十一年水災